

159

soa fin. Tutte le qual persone fo condute, per bon spazio, fina sopra una gran piazza, dove, soto la caxa del signor vice re, el qual con molti baroni et altri grandi stete a la finestra, era fato do alti soleri. Sopra uno, el piu alto, et molto adornato, se messe *pro tribunali*, sedendo, el prefato reverendo inquisitor, el prior de San Domenego de observantia con altri maistri, frati del suo hordine, 4 doctores, et poi, *ad pedes eorum*, preti e frati, e *multitudo copiosa*. Sopra l'altro soler, assai alto, fo messi in alto, è luogo più vistoso, li diti, vestiti con le corone negre e de fuoco etc. Quelle altre done et homeni, da li habiti e corone zale schiete, fo fati sentar sopra banche più basse. Sentadi che fo li diti, senza confortadori, nè alcun apresso, salvo loro medeni, con Crucifixi sempre in man, per un frate de San Domenego, valente predichador, provando per molte raxon et notabel evidentie la fede nostra esser la santa et la incarnationi di Cristo, e tochè molto utile et importante parte a questo bisogno necessarie, mostrando li errori di hebrei; e predichò per spazio de do bone hore, dove ne era grandissima moltitudine de ogni condition di persone; e da bon, savio e discreto el persuase, al concluder suo, quelli che da la morte era liberati, a far vita da boni cristiani, et quelli che fosseno per aver qualche pena corporal, *etiam* che el fosse la morte, a soportarla con pacientia, como fedel cristiani, per la fede et per amor de Dio, exortandoli et aducendoli molti exempli dei martori santi, i qual, a torto, vegnivano alcune volte per una vania, alcuni per un'altra sorte de acusation fati morir; excusando el reverendo inquisitor, che sopra le cosse atestà per molti testimonij, e non per utel proprio, li condanava. E con gran satisfaction del popolo fo finita la dita predicha, la qual expedita, per el cancelier del dito reverendo inquisitor, a uno per uno fo publichà i processi, prima di le donne, dal portar de testa zalo, et poi li homeni, pur da li abiti tuti zali, fazando a una a una per tanto, quanto se lezeva el suo processo, star im piedi, sopra la bancha. Queste tal confessò che in gran parte le fevano secondo la leze de Moyses, e veneravano el sabado più che la domenega, non manzando nè carne de porcho, nè galine, che non fosse amazà de cortelo; le dicevano oration hebreë, et molte altre cosse, che fanno li zudei. Queste tal done et homeni vestiti de zalo, con la $\dagger$ biancha da driedo, avea fato degni de la morte, over de grandissima punition; ma per aver confessà senza corda, li fo remessa et perdonà la morte. Alcuni fo poi condanati in vita im prexon, alcuni et algune a

tempo; et el frate fo condanà che 'l fosse desgradà, e poi, per certi anni, in galia con li feri, e fornidi questi dal zalo. Si comenzò prima a spazar l'immagine del morto, el qual soleva esser quello che diceva in la soa ascosa sinagoga, e tra le altre cosse, quando l'era amalà e morì, allora li fo portà el nostro Signor clementissimo, e quando questo crudel cam senti che i voleva che el se comunegasse, el fense che li venisse da render, et li voltò le spale al sacramento; et, vivando, el fece et disse molte cosse degne de ogni gran punitione. Poi fo leti i processi de le 3 done: queste haveano fato simel sorte de manchamenti, et alcune cosse pezo de le altre done, et se haveano imbarcato la madre et fiola per andar in terra, dove le podesseno far la vita a so modo, senza sospeto; *tamen* le meschine denegò el mal che le havea fato, et da poi che le haveno corda, le confessò la verità, et par che la leze non le salva de la vita. E la madre de quel certo Anzolo, che era gran maistra de l'arte, *etiam* denegò, et poi confessà. Queste fo cognossude per heretiche, zudiate e pertinaze, e non degne de alcuna remission, e comesse al brazo et foro secular, che le spazaseno. Et poi fo leti i processi, a uno per uno, de quelli 6 homeni; l'ultimo fo quel del dottor medego, i qual haveano fati assa' errori et manchamenti; tra li altri, essendo una dona amalada in caxa del medego, li fo portà el nostro Signor, et avanti se feze spazar la caxa, e quando lui vete el disse, che se fa? À da vegnir qua qualche conte, over baron? e uxò disonestè parole; e molti de questi non credeva in la resurection. Tuti 6 questi fo condanadi per eretici, azudiati et pertinazi, et fonno remessi *etiam* al foro secular, e fo condanati a la morte, e tuti li soi beni et facultade fo confiscade a la camera real. I fioli mascoli, fin al segundo grado, fo condanati, che i non podesseno haver dignità ni offitio, et privi de molte cosse, come son, nodari, avochati, maistri de botega; e le fie, fin al primo grado, *tantum*. Fo *etiam* condanà che le non podesseno portar oro, nè zoie, nè lavor de seda, nè di grana, sotto quelle pene; e, per lo medemo, i fioli di sopra nominati. Fato questa publication de condanaxon, prima fo dà sacramento sopra un mesal, im presentia de l'inquisitor e tuti astanti, a quelli che non se dovea far morir, da li abiti zali, da far vita da boni christiani, relassando ogni heresia e modi vechij; e cussi tutte done e homeni zurò servar. Da poi questi relasadi, fo tornati a la prexon, et quele 3 done, 6 homeni, et la pentura del tristo morto fo conduti fuora de la terra, per un trato de balestro, dove erano apariadi X

160